


Ni Pangulong
Thomas S. Monson



Si Pangulong Monson Nagapanawagan sang Kaisog

Halos wala sang oras, sa pagpanilag ni Pangulong Thomas S. Monson, nga wala kita nagakina-hanglan nga maghimo sang mga pagpili sing bisan ano nga sahi.

Sa paghimo sang maalamon nga mga pagpili, sia nag-laygay, kinahanglan naton ang kaisog—“ang kaisog nga maghambal indi, ang kaisog nga maghambal huo. Ang mga desisyon naga dikta sang kapalaran.”¹

Sa masunod nga mga sinabit, si Pangulong Monson nagapahanumdum sa mga Santos sa Ulihing mga Adlaw nga kinahanglanon ang kaisog sa pagtindog para sa kamatuoran kag pagkamatarong, sa pagpangapin sang ila ginapatihan, kag sa pag-atubang sang kalibutan nga nagasikway sang wala'y katapusan nga mga panindugan kag mga prinsipyo.

“Ang panawagan para sa kaisog nagaabot pirme sa tagsa sa aton,” siling niya. “Nangin amo sini sumugod sadto, kag magapabilin nga amo sini.”²

Ang Kaisog Nagadala sang Pagpakamaayo sang Dios

“Tanan kita magaatubang sang kahadlok, magaeksperiensya sang pagyaguta, kag magasugata sang oposisyon.” Himuon naton—tanan kita—nga mag-angkon sang kaisog nga batuan ang ginaugyunan sang kadam-an, ang kaisog nga magtindog para sa prinsipyo. Kaisog, indi ang pagkom-promiso, ang nagadala sang pagpakamaayo sang Dios. Ang kaisog mangin isa ka mapuslonon kag makahulunganon nga

kinaiya kon kabigon ini nga indi lang ang kahanda nga mapatay sing maisog kundi isa man ka determinasyon nga magkabuhi sing disente. Sa aton padayon nga pagpangakaton, nga nagatinguha nga magkabuhi sing nagakadapat, pat-od gid nga magabaton kita sing bulig gikan sa Ginuo kag makasalapo sing kaumpawan sa Iya mga pulong.”³

Magbatas nga may Kaisog

“Ano ang buot silingon sang magbatas? Nanamian ako sini nga kahulugan: *makigsumpong nga may kaisog*. Ang kaisog mahimo nga kinahanglanon agud kamo magpati; ini kon kaisa mangin kinahanglanon man sa inyo pagtuman. Ini pat-od gid nga pagakinahanglanon sa inyo pagbatas tubtob sinang adlaw kon ka san-o kamo magataliwan na sining mortal nga kabuhi.”⁴

Mag-angkon sing Kaisog nga Magtindog para sa Kamatuoran

“[Kabay] nga kamo makaangkon sing kaisog nga magtindog para sa kamatuoran kag pagkamatarong.” Bangod nga ang uso sa sosyedad sa karon malayo sa mga panindugan kag mga prinsipyo nga gihatag sang Ginuo sa aton, halos pat-od gid nga pagatawgon kamo agud magpangapin sinang inyo ginapatihan. Magluwas kon ang mga gamot sang inyo panaksihon mapag-on nga natatum, mangin mabudlay para sa inyo ang makigsumpong sa mga pagpangyaguta sinang mga nagahangkat sang inyo pagtuo. Kon mapag-on ang pagkatanum, ang inyo

panakshion sa ebanghelyo, sa Manluluwas, sa aton Amay nga Langitnon magaimpluwensya sang tanan ninyo nga ginahimo sa bug-os ninyo nga kabuhi.”⁵

Kinahanglanon Naton ang Espiritwal kag Moral nga Kaisog

“Ang mga mensahe nga ginapakita sa telebisyon, sa mga sine, kag sa iban pa nga media [sa karon] masami nga baliskad kaayo sa sinang gusto naton nga batunon kag pakamahalon sang aton mga kabataan. Aton responsibilidad indi lamang ang tudloan sila nga mangin nagaksanto sa espiritu kag doktrina kundi nga buligan man sila nga magapabilin nga subong sina, bisan ano pa nga mga impluwensya sa gwa ang ila masugata. Ini magakinahanglan sang dako nga panahon kag kabudlay sa aton bahin-kag agod makabulig sa iban, kita mismo nagakinahanglan sang espiritwal kag moral nga kaisog agud pakigbatuan ang aton makita nga malain sa bisan diin.”⁶

Kabay nga Magapabilin Kita nga Maisog

“Sa pagpangabuhi naton sa adlaw-adlaw, indi gid mali-kawan nga pagahangkaton ang aton pagtuo. Mahimo nga kon kaisa masalapuan naton ang aton kaugalingon nga napalibutan sang iban nga mga tawo apang nagatindog nga minorya ukon basi gani nagatindog nga isahanon parte sa kon ano ang husto kag kon ano ang indi-husto. . . .

“Kabay nga magapabilin kita nga maisog kag naka-handa nga magtindog sa kon ano ang aton ginapatihan, kag kon kinahanglanon nga magtindog kita nga isahanon sa sina nga higayon, kabay nga mahimo naton sing may kaisog, nga napabakod sang ihibalo nga sa pagkamatuod wala gid kita nagaisahanon kon nagatindog kita upod sa aton Amay sa Langit.”⁷

MGA TANDA

1. Thomas S. Monson, “The Three Rs of Choice,” *Liahona*, Nob. 2010, 67, 68.
2. Thomas S. Monson, “The Call for Courage,” *Liahona*, Mayo 2004, 55.
3. Thomas S. Monson, “Be Strong and of a Good Courage,” *Liahona*, Mayo 2014, 69
4. Thomas S. Monson, “Believe, Obey and Endure,” *Liahona*, Mayo 2012, 129.
5. Thomas S. Monson, “May You Have Courage,” *Liahona*, Mayo 2009, 126.
6. Thomas S. Monson, “Three Goals to Guide You,” *Liahona*, Nob. 2007, 118-19.
7. Thomas S. Monson, “Dare to Stand Alone,” *Liahona*, Nob. 2011, 60, 67.

PAGTUDLO GIKAN SA SINING MENSAHE

Mahimo ninyo pamangkuton sila nga inyo gitudloan nga magpanundum sang isa ka sitwasyon sa maabot nga semana—sa balay, sa obra, sa eskwelahan, ukon sa Simbahan—nga magapangayo sa ila nga maghimo [sang isa ka bagay] nga may kaisog. Mahimo nga sila magaatubang sang kahadlok, magabatas sang isa ka bagay nga makahalangkat, magatindog sa ila mga ginapatihan, magadesisyon sa pagtuman sing lubos sang isa ka prinsipyo sang ebanghelyo. Agdaha sila sa pagpaambit sang ila mga panghunahuna ukon sa pag-sulat sang mga ini.

LAMHARON

Sarah sa Iban nga Tawo

Ni McKenzie Miller

Nabudlayan ako sang una nga gamiton ang akon mga ginapatihan sa pagsabat sa simple nga pamangkot pareho sang “Ngaa wala ka nagainom sang kape?” Sang una nagahimo ako sang mga balibad pareho sang “Kapait kaayo” or “Indi ako nanamian sang sabor.”

Ngaa bala nga nahuya ako? Ngaa bala nga nahadlok ako kaayo nga magtindog para sa kon ano ang akon ginapatihan? Kon akon balikan sa karon, indi ko gid mahangpan kon ngaa nahadlok ako. Pero madum-duman ko kon san-o ako nag-untat sa pagpanago sa likod sang mga balibad.

Isa ka adlaw sa akon klase sa English sa high school, ang teacher nag-anunsyu nga magatan-aw kami sang palagwaon sa tv nga nahibal-an ko nga indi ko dapat lantawon. Samtang ang iban nga mga estudyante nag-hinugyaw sa kalangkag, ang akon kaklase nga si Sarah nag-alsa sang iya kamot kag nagpamangkot kon pwede sia maggwa.

Sang ginpamangkot sia sang maestra kon ngaa, si Sarah nagsabat sing prangka, “Tungod isa ako ka Mormon kag wala ako nagatan-aw sang mga palagwaon nga may pamuyayaw.”

Ang iya kaisog sa pagtindog sa tunga sang klase makadalayaw. Salamat kay Sarah, ako man, nagtindog kag naghulat sa gwa nga may matinlo nga konsyensya hasta matapos ang palagwaon.

Dalayon ako nga nag-bag-o. Nagsugod ako sa pagpaathag sang akon mga ginapatihan imbis nga maglikaw sa topiko. Bilang resulta, nakaangkon ako sang kompiyansa sa akon kaugalingon kag mas nag-partisipar pa gid sa mga kahiwatan sa Simbahan kag sa eskwelahan.

Wala ko gid masugiran si Sarah kon paano ka makahulugan sa akon ang iya halimbawa, apang ginatinguhaan ko nga sundon ang iya halimbawa sang kompiyansa. Akon na karon nahangpan nga ang pagkamiyembro sa dalayawon, sagrado nga Simbahan sang Dios indi gid dapat ikahuya. Kabay nga sarang ako, paagi sa akon halimbawa, mangin isa ka Sarah sa iban nga tawo.

Ang tagsulat nagaistar sa Utah, Estados Unidos sang Amerika.

MGA KABATAAN

Kaisog sa Balaan nga mga Kasulatan

Si Pangulong Monson nagatudlo sa aton nga mag-angkon sang kaisog kag magtindog para sa kon ano ang aton ginapatihan. Madamo sang halimbawa sa balaan nga mga kasulatan sang mga tawo nga nagpakita sang kaisog. Basaha ang balaan nga mga kasulatan nga nagasunod sa tagsa ka ngalan. Paano ginpakita sining mga tawo ang kaisog kag nagtindog para sa kon ano ang ila nahibaloan nga matuod? Mahimo ninyo isulat ukon i-drawing ang isa ka larawan sang inyo sabat.

Daniel (Daniel 6:7, 10-23)

Ester (Ester 4:5-14; 5:1-8; 7:1-6)

Samuel nga Lamanhon (Helaman 13:2-4; 16:1-7)

Joseph Smith (Joseph Smith—History 1:11-17)



Mga Kinaiya ni Jesucristo: Wala sing Limbong ukon Pagkasalimpapaw

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sa kabuhi kag misyon sang Manluluwas makapadugang sang inyo pagtuo sa Iya kag magabugay sa ila nga inyo ginabantayan paagi sa visiting teaching? Para sa dugang nga impormasyon, maglog-on sa reliefsoociety.lds.org.

Kabahin ini sang sunod-sunod nga mga Mensahe sa Visiting Teaching nga nagapakita sang mga kinaiya sang Manluluwas.

Ang paghangop nga si Jesucristo wala sing limbong kag pagkasalimpapaw makabulig sa aton nga matinuohon nga makapaninguha sa pagsunod sang Iya halimbawa. Si Elder Joseph B. Wirthlin (1917–2008) sang korum sang Napulo'g Duha ka mga Apostoles nagsiling: “Ang pagpanglimbong amo ang pagdaya ukon pagpatalang. . . . Ang tawo nga wala'y limbong isa ka tawo nga inosente, may tampad nga tinutuyo, kag puraw nga mga motibo, nga ang iya kabuhi nagapakita sang iya simple nga pagginawi nga nagasanto sa mga prinsipyo sang integridad. . . . Nagapati ako nga ang kakinahanglan sang mga miyembro sang Simbahan nga mangin wala sing limbong mas ginadalian sa karon sangsa ano pa man nga panahon tungod madamo sa kalibutan ang maathag nga wala makahangop sang kapuslanan sini nga kinaiya.¹

Sa pagkasalimpapaw, si Pangu-long Diether F. Uchtdorf, Ikaduhang Manuglaygay sa Unang Panguluhan, nagsiling: “Wala ni isa sa aton ang pareho gid ka Cristohanon suno sa aton nga nahibaloan nga nagakadapat. Apang sinsero kita

nga nagahandum nga madaug ang aton mga kasaypanan kag huyug sa pagpaketala. Sa bug-os naton nga tagipusuon kag kalag nagahendum kita nga mangin mas maayo sa bulig sang Pagpasag-uli ni Jesucristo.²

Nakahibalo kita nga “pagahukman kita suno sa aton mga buhat, mga handum sang aton mga tagipusuon, kag sa sahi sang tawo nga kita nangin.”³ Pero kon kita nagatinguhua sa paghinulsol, kita mangin mas puraw—kag “bulahan ang mga putli sing tagipusuon: kay sila makakita sa Dios” (Mateo 5:8).

Dugang nga Balaan nga mga Kasulatan

Mga Salmo 32:2; Santiago 3:17; 1 Pedro 2:1–2, 22

Gikan sa Balaan nga mga Kasulatan

Ang magagmay nga kabataan wala sing limbong. Si Jesucristo nagsiling: “Tuguti ninyo ang kabataan sa pagkari sa akon, kag dili sila pagdumilian: kay ang ginharian sang Dios ilá sang mga kasubong nila. . . . Kag Iya ginkugos [ang kabataan] kag ginpakamaayo sila” (Marcos 10:14,16).

Si Cristo nag-alagad man sa mga kabataan sa Amerika pagkatapos sang Iya Paglansang. Iya ginsugo ang mga tawo nga dalhon nila

palapit ang ila magagmay nga mga kabataan kag “ginpamutang sila sa palibot sa iya, kag si Jesus nagtindog sa tunga; . . .

“. . . [Kag] naghibi sia, kag ang kadam-an nagpamatud sini, kag ginkuha niya ang ila magagmay nga mga kabataan, sing isa-isa, kag ginpakamaayo sila, kag nagpangamuyo sa Amay para sa ila. . . .

“Kag samtang nagatulok sila sa pagtan-aw ginbayaw nila ang ila mga mata ayon sa langit, kag . . . nakita nila ang mga anghel nga nagapanaog gikan sa langit nga daw yara sa tunga sang kalayo; kag nagpanao sila kag ginpalibutan yadtong magagmay nga mga kabataan, . . . kag ang mga anghel nag-alagad sa ila” (3 Nefi 17:12, 21, 24).

MGA TANDA

1. Joseph B. Wirthlin, “Without Guile,” *Ensign*, Mayo 1988, 80, 81.
2. Dieter F. Uchtdorf, “Come Join with Us,” *Liahona*, Nob. 2013, 23.
3. *Handbook 2: Administering the Church* (2010), 1.2.1.

Binagbinaga Ini

Ano ang aton matun-an parte sa pagka-wala sing limbong gikan sa magagmay nga mga kabataan? (Tan-awa sa Guide to the Scriptures, “Guile.”)